


# MOKOLO YA MAMA

 . . . tabernacle, ezali libondeli na ngai. Nazali mpenza na esengo na ntongo oyo, komona bomati kati na molimo ya tabernacle oyo, mpe lolenge oyo, elembo etiami kuna na libanda, bazomilengela sikoyo mpo na kotonga losambo ya sika. Nakanisi bosenga na yango ezali. Mpe komona nsima . . . soki Nkolo Yesu aumeli, nsima na biso kokende, bakozala na . . . bana na biso bakosengela kozala na esika mpo na kokende na losambo. Mpe biso tolingi “kobunda makasi mpo na Kondima oyo epesamelaki basanto mbala moko mpo na libela.” Nakanisi ete ezali likambo moko malamumu.

<sup>2</sup> Mpe wana nazalaki bobele kokóta, eleki ntango molai te, mpo na kobakisa na matatoli ebele oyo esili kopesama na ntina na lobiko ya nzoto, ya mwa mayangani ya nsuka, awa na tabernacle. Ezali bobele kobakisama ntango nyonso, na oyo etali lobiko na nzoto, bikamwisi minene ya lobiko na nzoto.

<sup>3</sup> Nauti kotika mwasi na ngai libanda, kaka sikawa, mpe bana na—na ekuke; mpe ezalaki na ndeko mwasi moko, oyo afandi awa na ngonga oyo, azalaki mpenza na esengo kino akomaki kolela, na ntina na ekamwiseli monene oyo esalemaki epai ya nkoko na ye ya mobali, kuna mosika, nabanzi, na Chattanooga. Mme. Nash, oyo awa, nkoko na yo moke ya mobali atungisamaki na mpasi moko, mpe liyangani ya nsuka awa, Nkolo Yesu, nabanzi, atalisaki yango, mpe alobaki: “YANGO ELOBI NKOLO, ete, esili nye. Mpe akoyóka malamumu.” Mpe mwana moke yango akomi na nzoto kolongonu mpenza mpe malamumu, mpenza na ndenge nyonso oyo akoki kozala.

Mpe ezali—ezali kopesa esengo mpenza, ntango oyoki matatoli wana.

<sup>4</sup> Mpe lisusu elenge mobali moko, oyo azali mpe awa, asengaki libondeli mpo na Mme. Stotts, oyo auti koleka na lipasó. Mpe litómba na bango; bomoni, soki moto moko te alingi ete tobondela mpo na bango, boye na ba . . . ezali kotalisa, na ntango nyonso oyo ozomeka, bato balingaka óbondela mpo na bango, na boye bango, ezali litómba, bomoni. Mbala mosusu ekómaka yikiyiki mpenza, kino . . . yikiyiki te, kasi ebele mpenza, na ndenge ete okosengela kaka ókima libanda esika moko boye mpe ótia motó na yo mosika, mpe óbómbana mwa moke, mpo na kobika. Kasi, na—nazali na esengo ete bango basalaka yango. Bókanisa ata moke te ete nalingaka komona bango te, mpamba te soki bango . . . soki ezalaki na moto moko te oyo alingaki ete nábondela mpo na ye, esika nini lotómo na ngai elingaki kozala? Bomoni? Bomoni?

5 Kasi ntango mosusu ntango olobaka: “Ndeko Branham, nasosolaka te ntango bato bazóbénga ndenge wana, mpe—mpe yo okoselimwa libanda esika moko boye.” Nasengeli kosala yango mpo na kobika, mpo na kobondela mpo na bato. Ozali kaka te. . . Ezali te—ezali kaka esika moko te, awa. Ezali na mokili mobimba. Bomoni? Mpe—mpe ezali mpenza matata. Mpe nandimi mpenza ete bozali kososola yango.

6 Oh, ezali mpenza malamau kozala Moklisto! Nayebi mpenza te nini nalingaki kosala soki ezalaki mpo na Klisto te, na boye. . . mpe kozala na boyokani elongo ná Baklisto, ete, bato ya Kondima ya motuya ya lolenge moko, oyo bandimelaka Nzambe mpe bazali kotiela Ye motema; mpe bazondima ete mokolo moko ya nkembo tokosilisa ná etumba nyonso oyo, mpe tokozala na elóna, mpe tokotélema basikolami na lolenge na Ye, na ngámbo mosusu.

7 Na boye nakolinga kopesa liyebisi moko na bokuse, ete, na oyo etali kotongama ya tabernacle, mpe bongo na bongo, na. . . tozali kozongela lisusu fondation na biso, mingi koleka eteni oyo elobeli ngai mpo na makita. Na kolandeláká mayangani, uta nabandáká likambo oyo, na oyo etali kopalanganisa Nsango—malamu, eleki mibu ebele, na esika ya kokela fondation moko, mpo na kosala lisanga mosusu ya bato, nasalelaki bobele lisanga oyo namesanaki na yango; mpe longwa na. . . mpe nasalaki fondation moko, ete mayangani na ngai nyonso ékoka kosalema na nkembo ya Branham Tabernacle. Mpe yango nde bakosalela na Union National Bank na New Albany, epai oyo mosolo ekokaki kofutama—kofutama na nzela na yango, ete éfutamelaka mpako te. Soki bongo te, mbongo nyonso oyo ezalaki kozuama elingaki kosala ete náfutela yango mpako, soki násalelaka Branham Tabernacle te lokola fondation.

8 Mingi kati na bino basili koyoka ngai kopesa liyebisi yango, mbala na mbala. Nasengeli kosala yango, mpe ko. . . mpo na kosala yango. Na bongo—bongo tozali kobongisa kosala fondation ya sika sikawa. Mpe tokolinga ete mingi bayeba ete na. . . Bato boni basilá koyoka ngai koyebisa yango, ete kofútama nyonso, nalekisaka yango na nzela ya Branham Tabernacle? Bótombola bobele maboko, bino nyonso. . . Ya solo mpenza, bino nyonso. Ezali bato nyonso.

9 Na bongo ntango losambo ekosila, soki bokolinga, nazali na mwa mokanda moko kuna, mpo ete bino, soki bokotia linzaka wana bozali kobima. Ndeko Roy Roberson akozala na yango kuna.

10 Mpamba te, tokobandisa fondation mosusu, ya ndenge moko, bobele. . . kasi fondation mosusu, ete mosolo na biso nyonso mpe makambo mosusu, oyo ezali kokongolama na liyangani, éfuta mpako te, ekozala. . . étiamu, bo momesano, kati na Union National Bank, mpo na ésalema na nzela ya tabernacle, esika ya

kozala na—na fonda . . . fondation mosusu. Mpamba te, oyo esili kozala fondation, na nkombo ya Branham Tabernacle, bomoni. Mpe boye ezali na Branham moko *awa* mpe Branham moko *kuna*, mpe lolenge oyo, ná ba-fondation ndenge na ndenge, oyo wana ezali malamumu mpenza te.

<sup>11</sup> Ndeko Roberson akotala likambo yango, bino baoyo bokolinga, wana tozali kobima. Tokosepela na likambo yango.

<sup>12</sup> Sikoyo, na ntongo oyo, liboso ete tókota na liteya, nalingi koloba, soki Nkolo alingi, ete nakomeka kozonga lisusu na mpokwa oyo. Nayinaka kobotola Ndeko Neville mayangani nyonso mibale, kasi asengaki ngai mpenza na bolingo nyonso ete náloba lisusu na mpokwa oyo. Mpe soki Nkolo alingi, nalingi koloba na mpokwa oyo na ntina ya liteya ya kopalanganisa nsango—malamu, ebiangeli ezali: *Oyo Azali Nani? Bomoni? Oyo Azali Nani?*

<sup>13</sup> Na bongo, na ntongo oyo, nalingi ko . . . Nazalaki kokanisa ko—koloba na ntongo oyo likoló na Mokolo ya Mama, lokola motó ya liteya. Mpe nayebi ete nsima ya nzánga oyo mpe ntongo, etondisamaki nyonso na ba-manaka ya Mokolo ya Mama. Boye nakanisaki nakosala lokola kosangisa eloko moko, mpo tolingi kobondela mbala moko mpo na babéli, nsima na losambo oyo kosila, mpe lokola momesano.

<sup>14</sup> Tondimaka ete Nzambe azali mobikisi babeli, mpe Abikisaka babeli mpe bato na mpasi. Mpe nayebi ete Asalaka yango. Mpe ezali mosika koleka ba—ntembe nyonso—nyonso, mpo ete, mpamba te matatoli etondi meke, ete biso toyebi yango.

<sup>15</sup> Lobi nazalaki koluka kati na libenga oyo Ndeko Gene mpe Leo bautaki kobatela, ya matatoli oyo balokotaki. Mpe ezalaki libenga monene etondi na bikamwilesi ya kafukafu ya lobiko ya nzoto oyo Nkolo asili kosala mpo na bato.

<sup>16</sup> Mpe nakanisaki, soki yango ekokaki kozala bongo, bongo soki tokokaki kotanga makambo nyonso oyo esalemá? Nabanzi, na Porto Rico mpe na Jamaica, kaka, ekokaki kobimisa, matatoli nkoto zomi, to malamumu koleka, matatoli ya kafukafu, ya lobiko na nzoto kouta na Nkolo, oyo Ye asalaki.

Sikoyo, liboso tófungola Buku, tósolola na Mokomi yango.

<sup>17</sup> Nkolo, tozongisi matondi mingi epai na Yo, ete ezali, ntango togumbi mitó, tozali kaka kobetabeta monoko mpo na maloba ya koloba; mpo nandimaka te ete bibebu ya moto ezali na makoki ya kotalisa mayóki ya motema ya mobali to mwasi, elenge mobali to mwasi, oyo atikálá kokutana na Yo. Mpo na kotalisa kokumbamela na biso, mpe boni tokumisaka Yo, mpe oyo Yo ozali mpo na biso. Yango ekaboli biso na lisumu, mpe ekaboli biso na mokili. Mpe epebi biso eloko moko oyo ezali ya Seko mpe epámbolámi. Kasi tokokaki kozua maloba oyo elongobani te.

<sup>18</sup> Ndenge elobamaki mbala moko na moto moko ya lokumu, eleki mwa ba-mpóso, oyo akokaki kosolola malamú mpenza na nkota ndenge na ndenge pene na libwa, kobateláká mosala na ye ya mopesi toli epai ya molingami tata Mokonzi ya ekolo, Dwight Eisenhower. Mpe atako ná makoki ya koloba nkota libwa, na pete mpenza; alobaki, ntango azuaki Molimo Mosanto, amekaki nyonso libwa, mpe ezalaki na maloba te oyo akokaki kozua, akokaki koloba eloko te, mpe Opesaki ye lokóta ya sika mpo na koloba na yango mpe kotondo Yo na yango. Mpe tomiyokaka mpe bongo, Nkolo; ete, ntango bomoi ekosila, ete ntango mosusu, tokokoka kosolola biso nyonso na lokóta moko ya ndenge mosusu, mpo ete tókoka kotalisa oyo tozali kokanisa na ntina na Yo.

<sup>19</sup> Sikoyo tokosenga, Nkolo, ete Ópambola tabernacle oyo, mobateli na yango, bayangeli misolo na yango, basungi na yango, baoyo nyonso basalaka elongo kati na yango, bato oyo bayáka awa, kokota mpe kobima na bikuke. Tika ete yango ézuama ntango nyonso lolenge ebonzamedi, esika moko ya bopemi, epai wapi baoyo balembi bakoki koingela na bikuke na yango mpe kozua bopemi mpe kimia ya elimo na bango. Mpe ete bato na bokono bakoka koingela na ekuke, mpe kobima na nzoto kólóngónó mpo na Bozali ya bomoi-ntango-nyonso ya Nzambe na Nguya-nyonso Oyo azalaka o ntei na yango.

<sup>20</sup> Tokosenga, Nkolo, ete na manaka oyo ezali koya ya . . . oyo ezali kobongisama sikoyo, ete Yo ókutana ná bakambi mpe ókutana ná bato nyonso. Mpe soki ekosepelisa Yo ete bokundóli ya libondeli oyo elobamaki na libeke ya kala oyo, ekokóba kosalema, ná libondo ya matiti, mokolo moko; oyo esili kokoma sikoyo ndako ya polé, esika ya bopemi mpo na molembi, mpamba te libondeli wana ezuaki eyango yango.

<sup>21</sup> Sikoyo limbisa biso mpo na eloko nyonso oyo tosalaki, to tolobaki, to tokanisaki, oyo ekesanaki na mokano monene na Yo; mpe mikanisela, Nkolo, ete yango eutaki na mitema na biso te. Totalisaki bobele yango na misala na biso to na bibebu na biso. Kasi, nokinoki, Yo oyokaki biso. Ntango tomonaki ete tozalaki na libunga, tozalaki na mposa ya koyambola yango. Mpe tolingi kobatela yango kati na mitema na biso te, lisumu na nko, boye toyebi ete Nzambe akolinga koyanola mabondeli na biso te; kasi toyambolaka ntango nyonso mabunga ma biso.

<sup>22</sup> Mpe tokosenga, Nkolo, ete Ópambola, na ntongo oyo, na ekolo mobimba, wana ezali yango kosepela ntina na mokolo oyo ya ekaniseli ya Mokolo ya Mama. Kasi tika ete oyo ézala kaka mo—mokolo ya mama te; tika ete mokolo nyonso ézala bongo.

<sup>23</sup> Nzambe, sala ete na ntongo oyo, bamama, basi, oyo bazali koyengayenga mosika na Nzambe, ete bazonga na bomoto na bango moko, na ntongo oyo, mpe básosola ete liloba oyo *mama* elingi koloba: “oyo asili kobota.” Tika ete áyeba ete bana na ye,

longwa na bosangani na ye ná mobali na ye, ezali mwa mabanga ya motuya oyo Nzambe atiaki na nsé ya kobatelama na ye. Bongo, Nzambe akotuna ye mokumba ya kobokolama ya bana yango. Mpe ndenge Likomi elobi, ete: “Mwasi malamu, mpe mama, oyo ye azali, bana na ye bakobenga ye mopambolami.”

<sup>24</sup> E Nkolo, ntango tozali komona mokolo oyo, wana bazokende mpenza mosika na Makomi, mpe bazosala makambo lokola banyama mpenza! Tosengi, Nzambe, ete Ópesa biso kolamukisa ya lolenge ya kala oyo ekobenga bango bázonga na esika basengelaki kozala.

<sup>25</sup> Nkolo, tolingi te, ata moke te, kobósana kotónda Yo mpo na bamama ya solosolo, mpamba te toyebi ete tozali na baoyo bazali kobika ndenge wana lelo; bamama ya solosolo, mpenza. Nzambe, pámbola bango. Bazali na motuya monene mpo na biso, mpe tobondeli ete Ókóba kozala elongo ná bango, Nkolo, mpe tika ete bábika na esengo mpe bámona mbuma ya libumu na bango kosalela Nzambe.

<sup>26</sup> Mpe tobondeli, Nzambe, ete baoyo balati rose ya mpembe, na ntongo oyo, to folólo ya mpembe, mpo na kotalisa ete mama na bango asili koleka na ngambo ya bomoi oyo lelo; tika ete, Nkolo Nzambe, bápema na kimia mpe misala na bango milanda bango. Sala yango, Nkolo.

<sup>27</sup> Sikoyo zua Liloba na Yo, Nkolo, mpe lobá na bato, mpe pesa bango mpiko, mpamba te ezali mpo na yango nde tosangani awa; mpo na koyoka Bozali na Yo, koyoka Liloba na Yo, mpe kopambolama; mpe kolongwa awa mpo na kozala mibali mpe basi malamu, bilenge mibali mpe bilenge basi malamu, koleka oyo ezalaki biso ntango tokotaki. Tosengi yango na Nkombo na Yesu, Mwana na Nzambe. Amen.

<sup>28</sup> Nalingaka litangi ya Liloba na Ye oyo epambolami. Boye sikoyo tokofungola, na ntongo oyo, na Buku ya Bakolinti ya Liboso, mpe tokotánga eteni moko ya mokapo ya 15, kobanda na molongo ya 1.

*Lisusu, bandeko, nazali koyebisa bino nsango-malamu oyo nateyaki bino, oyo mpe bino bosili koyamba, mpe kati na nini bozali kotelema;*

*Na nzela na oyo mpe bosili kobikisama, soko bozali kobatela na ekaniselí oyo nateyaki bino, soki bongo te bondimaki bobele mpamba.*

*mpe ete napesaki epai na bino oyo mpe esilaki ngai kozua, ndenge Klisto akufaki mpo na masumu na biso kokokana na makomi;*

*Mpe ete akundamaki, mpe ete asekwaki mokolo ya misato kokokana na makomi;*

<sup>29</sup> Bokoki koloba: “Ndeko Branham, yango ezali nkomá moko libanda na momesano mpo na liteya ya Mokolo ya Mama.”

Ee, ezali ya solo. Kasi, boyebi, Nzambe azalaka libanda na momesano, mpe Asalaka makambo na lolenge ya libanda na momesano.

<sup>30</sup> Mpe nazali kokanisa, makanisi, na ntina ya mama. Mpe nazali na moko na ntongo oyo, na ngolu na Nzambe, oyo azali naino awa na mokili elongo ná biso. Mpe nazozongisa matondi mpo na mama. Kasi lokola tosengelaki kozala, lisusu, na losambo mpo na babéli, mpe koyebáká te ete nakozonga lisusu na mpokwa oyo, kasi nakanisaki ntango mosusu ete tokokaki kotalisa elili moko ya ndenge mosusu.

<sup>31</sup> Mama azali motuya mingi. Boyebi, moto ya liboso oyo ayambaka yo, na bomoi oyo, ezali mama na yo. Moto moko te akoki kosimba yo, mpamba te ozuamaki na zemi, mpe amemaki yo na nsé na motema na ye. Mpe ye azali moto ya liboso ya koyeba yo, mpe moto ya liboso, na bomoi oyo, ya ko—komema yo. Na bongo, ntango obotami, azali moko na maboko ya liboso oyo ekosimba yo mpe ekopangwisa mpisoli na miso na yo. Azali moto ya liboso ya kobondisa yo mpe kolinga yo, mpe kolakisa yo bolingo na nsé ya mongóngo, na bomoi oyo, ezali mama na yo. Sikoyo, nabanzi ete lokumu ya kokoka ezali te oyo tokokaki kopesa na mama.

<sup>32</sup> Mama azali moto ya liboso ya kozala elongo ná mwana, mpe azali na mokumba monene na oyo mwana yango akozala, ekotalela lolenge oyo mama yango akobandisa mwana yango na nzela oyo asengeli kotambola. Mama azali na mokumba yango, kouta na Nzambe, ya kotia mwana yango na nzela elongobani. Mpe nakanisi yango nde ntina oyo bamama bazalaka na mwa esimbeli moko ya ndenge mosusu.

<sup>33</sup> Nayebi mwana mobali moko na engumba oyo. Nakanisi mama na ye azali awa sikoyo. Azali pene na mbula na ngai. Kasi nazali koloba likambo oyo te mpo na kosala mama yango mpasi; mpamba te azali na ba—mpasi mingi ya kokota, lokola ba—mama nyonso. Kasi mwana mobali yango amelaka masanga, mpe amelaka mingi mpenza. Mpe ntango akomaka na kwiti mpenza, akoya na ndako mpe akopumbwa na mbeto ya mama na ye mpe akozingela ye na maboko na ye. Mpe azali na bankoko. Kasi ezalaka na eloko moko kaka na ntina ya bobondisami ya mama, oyo esalaka lokola kozua esika moko ya—ya ndenge mosusu na nyonso oyo ekoki kosimba; ndakisa, na bomoi oyo, koloba na bomoto.

<sup>34</sup> Boyebi, moto lokola Mose, ye... Soki nakokaki kopesa lokumu na eloko moko na ezaleli na ye, ezalaki mpo azalaki na mama oyo Nzambe atindelaki ye. Boyebi ete ye nde abondelaki, Yokebede, mpe azalaki na mposa makasi ya mwana oyo. Mpe ntango abotamaki, azalaki moto oyo azalaki koyemba na bolingo na litoi na ye, mpe abondisaki ye mpe atongaki mwa kitunga mpe atiaki ye na matiti yango, wana mwa motema na ye

ezalaki kosala mpasi. Mwana na ye moke bobele moko, mpe azalaki mwa—mwa eloko ya motuya mpenza oyo ezalaki na mokili mobimba. Mpe ndenge mama alingaka bebe nyonso! Kasi komona mwa mwana moke oyo ya ndenge mosusu.

<sup>35</sup> Na bongo, na motema na ye, ayebaki ete abotamaki na ntina moko, mpe bongo kozua ye mpe kotia ye na kati ya ndako mpenza ya ba ngandó, kuna na kati ya ebale. Na nzela na kondima nde asalaki yango, koyebáká ete Nzambe azalaki na makoki ya kobatela ye; mpe mpo na kotalisa na bokuse bolingo ya mama, mpe mosala ya ezaleli ya kondima na ye. Mpamba te kondima emítíaka te likoló na zélo ya kozinda ya oyo yango ekoki komona; kondima efandaka ngwi likoló na libanga oyo eninganaka te ya Liloba na Nzambe ya Seko. “Mpamba te na kondima,” elobi Likomi, “asalaki likambo oyo.”

<sup>36</sup> Mpe kondima ekoki kozua etemelo na yango likoló ya libanga, oyo ba-mbonge ezali kobeta miboko yango, mpe yango ekotala sémba liboso na elongi ya kufa mpe eyebi ete ekozala bobele mpo na ntango moke, kasi kondima ekoki kotala na ngámbo ya máí monene epai na Ye oyo alobaki: “Nazali lisekwa mpe Bomoi,” mpe kozanga ata koyoka makelele ya mbongé.

<sup>37</sup> Yango nde lolenge ya kondima oyo mama na Mose azalaki na yango. Alakisaki ye mpe abokolaki ye na ndako ya Fáló, kolakisáká ye ete abotamaki na ntina moko, ete Yawe apesaki eyano na libondeli na ye. Mpe, ye . . . akokaki kozala na molakisi ya malamú koleka te. Yango nde esungaki kotonga ezaleli oyo Mose azalaki.

<sup>38</sup> Nabanzi ezalaki Abraham Lincoln moto oyo alobaki maloba moko lokola oyo . . .

<sup>39</sup> Sikoyo, nazali Democrate te to Republicain te, nazali bobele . . . nazali Moklisto. Mpamba te, nabanzi ngámbo moko ekokaki koloba eloko moko te kotemela ngámbo mosusu; nyonso ezali libebi. Kasi, Abraham Lincoln, na makanisi na ngai, azalaki moko na . . . mpe azalaki moko na Bakonzi ya ekolo ya monene koleka oyo Amerika oyo etikálá kozua; elongo ná Washington, mpe bongo na bongo.

<sup>40</sup> Mpamba te, Abraham Lincoln azalaki na—na ebandeli ya mabe. Azalaki mobola. Azaláki na moboko moko te, na oyo etali boyebi ya kelasi, to—to eloko moko ya monene, to mbongo, to eloko moko oyo ekokaki kosunga ye, ndenge Washington azalaki na yango. Washington asilisaki eteyelo ya likoló, mpe a—ayebaki mingi; azalaki moto ya mayele mingi, moto monene, mpo na kobanda. Kasi Lincoln abokolamaki na mwa ndako moke, na kati ya mabelé minene ya Kentucky, mpe mabaya ya nsé ezalaki te na kati ya mwa mobange ya ndako yango, oyo etiami lokola ekaniseli awa na Louisville na ngonga oyo. Kasi, lokola moto monene oyo ye azalaki, mpe asengelaki koyekola kokoma, kuna na mabelé oyo azalaki kobalola, mpo na kolóna masango.

41 Kasi nakoki ntango mosusu kokabola lisolo oyo na bilenge. Boyebi ete Abraham Lincoln azalaki na buku oyo ya ye moko te na bomoi na ye, kino nsima na ye kolekisa mbula ntuku mibale na moko, Bobele Biblia mpe buku ya ba-martyrs de Foxe? Bomoni, oyo otángaka etongaka ezaleli oyo yo ozali. Ékokamwisa te ete tozali na ebelé ya bato ya magboma lelo; mwa ba-zulunále mike ya masapo ya kala, ya bosoto mpe ezangi ntina, ezali kotiama na bitekelo ya ba-zulunále na biso. Azalaki na Biblia mpe buku ya ba-martyrs de Foxe. Bótala oyo yango ekomisaki ye!

42 Kasi liboso na makambo nyonso wana, mokolo moko, alobaki liloba moko lokola oyo. Alobaki: “Soki eloko moko ya malamumu ekokaki kozuama kati na ngai, ezali mpo na mama moko ya mosanto,” oyo akolisaki ye mpo na kosalela Nzambe.

43 Bomoni, mwana ayokaka mama na ye; ezali na mwa kosimbama moko ya mama wana, oyo ekosala ete mwana yango akoyoka. Ntango ayoki mpasi, akokende epai na mama mpo na kobondisama liboso ákende epai na tata. Mpamba te, azalaki liboso ná ye, boyebi. Mpe ezali na likabo moko oyo Nzambe apesaka mama, mpo na kozala lolenge wana; nalingi koloba mama ya solosolo. Sikoyo, nandimaka ete bamama bazali bato ya lokumu mpe ya bulee.

44 Kasi nandimaka, Mikolo ya Mama, lokola oyo, ezali bobúbi, mpo na kosala mbongo mingi na ba-feléle mpe bongo na bongo. Kasi mokolo ya mama esengelaki kozala mokolo nyonso. Ezali te kotindela ye libóke ya feléle na Mokolo ya Mama, kasi kolinga ye mpe kosunga ye, mikolo nkama misato na ntuku motoba na mitano, moí ná butu, na mbula mobimba. Kasi, ya solo, mokili ya mombongo ezali kokangana makasi na biloko lokola oyo, mpe e—e—ezali kosilisa lokumu ya mama.

“Oh, na bongo, Mokolo ya Mama oyo elekaki, natindelaki ye mwa libóke ya ba-felele.”

45 Akosepela, mingi mpenza, kaka kofanda mpe kosolola ná ye mwa moke, kokomela ye likambo moko, kobeta ye moke na lipeka, kopepwa ye na litama, koyebisa ye ete olingaka ye. Ekozala malamumu mingi koleka ba-feléle nyonso oyo okokaki kosómbe epai na moteki felele. Ezali ya solo.

46 Nabanzi ezalaki na Mibeko Zomi, ya nkondó Cecil DeMille, oyo akomaki mpe atiaki na etando moko na misala mibongi be na mokili ya cinema. Mpe liboso ete étalisama na etando, to ébima, Cecil DeMille abéngisaki Oral Roberts ná Demos Shakarian, ná ebele ya batei ya Nsango-malamumu na Mobimba, mpe amemaki bango na ndako na ye ya mosala, mpe atalisaki ngonga minei ya Mibeko Zomi yango, mpe atunaki bango makanisi na bango na ntina na yango. Nzambe ápemisa molimo na ye ya mpiko!

47 Mpe ntango namonaki yango, nazalaki kotala yango, mpe mwa likambo moko ekangámá na ngai ntango nyonso. Soki



mingi kati na bino oyo bamonaki yango, ezalaki ntango mwana mwasi ya Falo. . . nsima na Mose koyeba ete azalaki mo—mo-Ebele, mpe azuaki mokano ya kokende kofanda elongo ná bato na ye. Mpe mama na ye oyo azaláká mwasi kitoko afandaki wana, anunaki, ná nsuki na ye ya mpembe, elongi na ye enyúnyúká, afándáki na kiti moko ya maboko; lolenge ya mama mpenza. Mpe mwana mwasi ya Falo akotaki. Mpe alobaki: “Ngai nazali mwana ya nani, ata bongo?”

48 Mpe ntango likambo yango eyebanaki, ete Yokebede nde azalaki mama na ye ya solosolo. Mwana mwasi ya Falo, na bipakólá-pakola na ye, mpe bongo na bongo, mpe amibongisabongisa; alobaki: “Kasi, tala! Akoki kozala mwana na yo, kasi,” alobaki, “Ngai napesi ye bozui mpe bomengo. Yo okokaki kopesa ye eloko mosusu te bobele mabulu ya poto-poto.”

49 Kasi mobange ya mama oyo ya nsuki mpembe alobaki: “Kasi ngai napesi ye bomoi.” Yango nde esalaka bokeseni. “Napesaki ye bomoi.” Nzambe apesaki ye Bomoi na Seko. Boni ezali solo, mama!

50 Ntango mosusu bato balobaka na ngai, mingi mingi na mayangani na ngai, nazalaka “ntango nyonso koteya na ntina na lisekwa.” Mpe natángaki motó ya liteya na ntongo oyo, mokapo ya 15 mpe molongo ya 4 ya Bakolinti ya Liboso, likoló na lisekwa.

51 Kasi, bomoni, lolenge oyo bakómisi mama lelo, ezali libóke ya feléle moko efandi pembeni ya mobange ya mwasi moko, oyo azali mpaka mpe akoki kotelema te, ntango mosusu, mpe alembi, ná nsuki mpembe, ná masusá-masusá, mpe afandi na kiti ya maboko. Ekoki kozali solo. Kasi nalingi kozua lisolo na ngai mpe koyemela bino elili mosusu ya oyo mama azali.

52 Moto moko alobaki: “Oteyaka mingi likoló na lisekwa. Pene na Liteya nyonso ezalaka na eloko moko oyo etali lisekwa.”

53 Ee, ya solo mpenza. Ezali e—ezali esika mpenza ya bopemi ya Nsango-malamu. Ata Asalaki nini, soki Asekwaki lisusu te longwa na bakufi, boye nyonso wana ezalaki mpamba. Yango, mpo na ngai, etalisaka polele ete Azalaki Nzambe. Endimisaka maloba nyonso oyo Alobaki; lisekwa! Ezali mpe esika ya bopemi ya elimo. Ezali esika ya kobanda. Ezali kolatisama motolé ya kobondisama na biso.

54 Mpe ntango tomoni ete Asekwaki longwa na bakufi, yango etiaka biso, ná bibundeli ya Nsango-malamu, na molongo ya liboso ya etumba, mpo na kozua esika, mpo na kobunda. Mpamba te, toyebi ete Alobaki: “Ye oyo akobungisa bomoi na ye mpo na Ngai, akozua yango lisusu.”

55 Mpe nakanisi ezali kolatisama motole monene ya Nsango-malamu Mobimba, ezali lisekwa, mpe bilaka na yango ya Bonzambe, mpe kobondisama oyo yango epesaka na baoyo

batiaka motema na yango. Mpamba te, ezali kolaka bomoko monene ya kosangana elongo na biso lisusu. Ezali kolaka, mpe ko—kolongolama ya masumu nyonso. Epesi elaka ya kolongolama ya botengumi nyonso, minyoko nyonso oyo tosili kozua awa, tosengelaki koleka kati na yango, na bomoi oyo. Epesi elaka, mpe kolimwa na yango nyonso. Epesi elaka ete ata kufa ekobungisa makasi na yango, mpe tokosekwa na bokokani ya Yesu. Boye, na ndenge ya komona na ngai, lisekwa ezali likambo ya monene koleka bilaka nyonso na makambo ya Likomi. Wana nde epai etiaki yango elembo.

<sup>56</sup> Mpe Pasika ya nsuka, ntango nazalaki koteya likoló ya makambo mitano ya:

Na bomoi, Alingaki ngai; na kufa, Abikisaki  
ngai;  
Na bokundami, Amemaki masumu na ngai  
mosika;  
Kasi, na kosekwa, Alongisaki ngai ofele mpo  
na libela.

<sup>57</sup> Yango nde Mokolo mpo na ngai, Mokolo monene wana na mikolo! Mpe komona oyo yango ekotalisa, mpo na biso nyonso, na lisekwa, wana tozali kosala mosala mpe kozela Mokolo mopambolami wana ya mikolo!

<sup>58</sup> Epesaka biso elaka ete mokolo moko wana mibange ya bamama oyo, ya kolembé, basili makasi, ná nsuki mpembe, ná banzoto esili makasi bakobongwana. Ezali kaka te ete mama nde akofanda wana, ye moko, kasi libota na ye mobimba elongo ná ye.

<sup>59</sup> Mpe mokolo nini yango ekozala! Ntango nini oyo yango ekozala, ntango tokotala bilongi ya baoyo tolingaki malamú mingi! Bokeseni nini oyo ekozala na ntongo wana, ntango tokomona balingami na biso, mpe—mpe kotala oyo bakozala na ntango wana! Mitungisi nyonso ekolongolama. Bilembo nyonso ya minyoko ekosila. Matama ekausami na kufa ekozala lisusu te. Mpisoli na miso ekozala lisusu te. Lisekwa elakaka makambo nyonso oyo. Matanga ekozala lisusu te. Ekozala lisusu te likambo ya komama bebe yango na matama, oyo ekomi lokola eteni ya libanga; epai wapi mobongisi bibembe asili kobongisa yango, mpe atondosi yango mpe apakoli yango langi, mpe bongo na bongo, mpo émonana lokola ekufi te. Bosenga na yango ekozala lisusu te, kuna.

<sup>60</sup> Na bongo nakanisi ntango tokomona bango kotelema kuna na ngambo, balingami na biso, bamama na biso, mabota na biso, baninga na biso nyonso; mpe komona bango na nzoto na bango oyo ezangi kufa, ná nzoto na bango ya lola; kotaláká motindo na bango, komonáká lolenge bazali komikamba na bopolo mpe kimia, motema likoló-likoló to kotungisama ezali

lisusu te. Bongo komona bango batelemi kati na bokokani ya Nkolo Yesu, ekozala mokolo moko ya bikamwa.

<sup>61</sup> Mpe moko na moko na biso, na makanisi na biso, tozali kozela mpe kotalela na mposa makasi ngonga wana ya kobóndisama, ntango tokokutana ná bango. Moko na moko na bango azali kokanisa molingami na ye, ntango mosusu mama na bango oyo asilá kokenda. Mpe mokolo nini oyo yango ekozala, ntango okomona ye lisusu! Mpe epai na tata, mpe epai na ndeko mobali, mpe epai na . . . balingami nyonso, mokolo nini oyo yango ekozala!

<sup>62</sup> Nazali mpe kokanisa, sikoyo mpenza. Nazali kokanisa mpo na libota na ngai, ekotalisa nini mpo na ngai na Mokolo wana.

<sup>63</sup> Nazali kokanisa yango, na ntongo ya lisekwa wana, ntango mosusu moto ya liboso akoya kokutana na ngai ekozala Sharon moke na ngai. Te, akozala kolenga-lenga te. Zabolo wana akoki kokota na esika wana te. Bokono ya meningite ekoki ata kosimba Mboka wana te. Akopepa ngai olelé lisusu te. Mwa miso mike wana, ya langi ya bulé ekozala kobina-bina wana azali kobwaka maboko na ye mpe koganga: “Tata!” Nakosepela komona ye, koyeba ete akokufa lisusu mokolo moko te; koyeba ete nyonso esili, yango wana nateyaka lisekwa na makasi nyonso.

<sup>64</sup> Bongo nakomona mama na ye, mama ya Billy, mwana na ngai ya mobali. Mpe nazali na bikaniseli mpenza ebele oyo ezali kokóba koumela. Nakanisi lisusu, ntango nazalaki komema ye awa; to Mr. Combs, na likoló awa, azalaki komema ye mbala na ye ya nsuka, mpe nazalaki kolanda ye, na motuka. Wana tozalaki kotambola na Balabala ya Nsambo, kuna mpenza; Billy, ná basanza zomi na mwambe.

<sup>65</sup> Ndenge balingaki komema ye na balabala, mpe kosala ete ámona ye. Mpe alalaki wana mpe kolela, kotala mwana na ye, kasi akokaki kopusana pene na ye te.

<sup>66</sup> Mpe nsima ya kokita na nzela, mobongisi bibembe ayaki mpe akitaki na—na—na Balabala ya Nsambo. Mama awa azalaki kobatela ye na ntango wana. Mpe azalaki kotelema libanda na kati ya lopango, alataki mwa kupe, ná mwa ekoti ya motane ekitá na ngámbo ya motó na ye. Mpe ntango mama yango, azalaki ya kolala likoló na mbeto ya babeli, na nsima ya ambulance wana, azotaláká ngai, ntango amonaki bebe na ye ateleme na lopango, koyebaká ete azalaki koleka mbala na ye ya nsuka; atelemaki longwa na mbeto ya babeli mpe agángáki, mpe atombolaki loboko na ye ya mikuwa-mikuwa, mpo na koyamba bebe na ye na kati ya lopango. Kasi akokaki kozua ye te.

<sup>67</sup> Oh, ekozala esengo komona ye na mokolo wana. Te, akozala na maboko mikwa-mikwa te, akozala na matama ya kozinda mpe te. Kasi akotelema na kitoko ya lola ya mwasi mokonzi ya Likoló, mpe ya mama. Miso na ye moindo, lokola mapapú ya kombekombe, ekozala kobina na esengo. Akozala mokongo ya

kogumbama te; epai wapi, zabolo wana ya Bokono ya Mpanzi akokota na Mboka wana ata moke te. Kasi, kozanga kufa, ekotelema na bokokani na Ye.

<sup>68</sup> Boye, nazolikia, oyo akolanda mpo na koya kokutana na ngai ekozala Edward, oyo tozalaki kobenga “Humpy,” nkombo na mokuse. Azalaki moto ya liboso kati na monyololo monene ya lilondo libwa, monyololo ya libota Branham. Azalaki lilondo ya liboso ya kokatana; oyo alandaki ngai. Nakomona Edward koya epai na ngai. Kasi, akufaki lokola mwana mobali na mbula zomi na libwa. Mpe ntango nakosimba ye na loboko na ngai, nandimi mpenza ete tokozala na makambo ebele ya kosolola, na bolenge, mpo tozaláká baninga. Tokangánaká esika moko. Atikaki ngai nálata kazaka na ye, mpe—mpe—mpe biloko, lokola bandeko oyo ya solosolo bazalaki kosala. Ekozala esengo komona ye lisusu.

<sup>69</sup> Mpe nakoyoka ye koloba eloko moko lokola boye: “Ozuaki liloba na ngai, Bill? Ozalaki kosala mosala ya kobokola bibwele na lopango ya bibwele, na ntango ya bolongwi na ngai na mabele. Kasi na lopitalo, natindaki liloba ete: ‘Boyebisa Bill ete nyonso ezali malamu.’”

Nakosepela koloba: “Iyo, Nazuaki liloba na yo, kuna libanda na esóbé.”

<sup>70</sup> Na bongo, nabanzi ete, oyo elandi ekozala tata na ngai. Ye azalaki lilondo oyo elandi mpo na kokende, mpe. . . Te.

<sup>71</sup> Nakanisi ete Charles azalaki lilondo oyo elandaki, ndeko mobali ya leki. Azuaki likama ya motuka ntango azalaki naino bobele mwana moke. Azalaki ntango nyonso kobenda lokolo na ye, wana azalaki kotambola. Kasi, boyebi, ntango nakomona ye, akozala kobenda lokolo yango te. Nyonso ekosilá mpenza nye, akotelema na bongengi ya elenge mobali.

<sup>72</sup> Mpe akoloba na ngai, eloko moko lokola boye, wana azali koseka. Akoloba: “Iyo, Bill, makama ezalalaka awa te. Mpe nazoyeba lisusu, butu oyo liboso nákamata na likama ya motuka, osololaki na ngai, tozalaki ya kotelema na mwa ekotelo ya ekuke ya mwa ndako na biso ya komikitisa,” mpe nazali kotala likoló na yango, na ngonga oyo sikoyo. “Olobaki na ngai na ntina na Nkolo, bobele mwa ngonga moke liboso ete nákende. Mpe ozalaki na eteyelo ntango nakendeki.”

<sup>73</sup> Bongo tata akoya. Oh, nakoki komona ye. Atako abetaki ngai ba-fimbo mingi mpenza, yango mpenza nde nazalaki na yango bosenga, kasi nakomona liboké ya nsuki moindo wana ya milelomilelo, ná bongengi nyonso koleka liboso, na mokolo wana. Mpe akotala ngai, mpe akoloba: “Mwana na ngai ya mobali, oyebi, Papa akotikala kotelema mpe kolongwa na mesa awa, lisusu te, na nzala, mpo na kotika bana na ye bália, mpo awa tozali na biloko mingi. Kozanga ezali awa soko moke te.”

<sup>74</sup> Komona ye ntango azalaki kosala mosala, mpo na mwa ba-centime ntuku mitano to ntuku nsambo na mitano na mokolo

moko, na nsima, kolongwa na mesa mpo bana bákoka kolia, kozonga kosala mosala lisusu. Mpe azalaki kosala mosala ya makasi mpenza kino simisi na ye ekozika na mói na mokongo na ye mpe mama azalaki kokata yango na sizó.

<sup>75</sup> Nakoyoka ye koloba eloko moko lokola boye: “Bill, ozoyeba lisusu na butu wana, yo ná Ndeko Georges boyaki kobondela mpo na ngai ntango nazalaki kokende? Oyebi, nayebisaki mama ete Banje mibale ya mpembe bazalaki wana na mbeto, mpe mwanje moko ya motane na lokolo. Mpe mwanje motane azalaki komeka kozua ngai, kasi Mwanje ya mpembe atelemaki katikati. Súkasúka bamemaki ngai na Ndako.”

<sup>76</sup> Na nsima, lisusu, oyo alandaki na lilondo ya kokende, to oyo akendeki, ekozala Howard. Nakomona Howard; wana tozalaki kokatisa bitúká lokola baninga, bisika nyonso; abengamaki kozala motei; ná bomoto moko monene, kasi baninga na ye bazalaki libaku mpo na ye. Lisolo ya nsuka oyo nazalaki na yango ná ye, alobaki: “Ntango nakokende, Bill. . .”

<sup>77</sup> Na—namonaki ye kokende, na nzela ya emononeli, pene na mbula minei liboso ete ákende. Nayebisaki ye ete namonaki Tata kotia elembo na nkunda na ye mpe koloba ete azalaki oyo akolanda.

<sup>78</sup> Mpe alobaki: “Ezali na eloko moko oyo nalingi ete ósala mpo na ngai.” Alobaki: “Nabulunganisaki bomoi na ngai. Nabálá mpe makambo nyonso wana. Na—nayebi te likambo nini ekómaki.”

Nalobaki: “Ondimeli Ye, Howard?”

<sup>79</sup> Alobaki: “Ná nyonso oyo ezali kati na ngai, Nandimeli Ye.” Kati na mikolo mibale to misato liboso na ye kolongwa, abongisaki makambo na Nzambe, elongo ná Ndeko Neville na bamosusu kuna. Mpe alobaki: “Ezali na eloko moko oyo nalingi ete ósala. Ntango nakondeke, Bill, yebisa bango báyembela ngai: ‘Akosósola, Mpe Akoloba: “Esalami Malamu.”’”

<sup>80</sup> Nandimi ete, liboso nápésa mbote ya loboko na Howard, nakoyoka ye kotelema mpe kotala ngai, mpe koloba: “Bill, Asósólaki.”

<sup>81</sup> Nsima na yango, Ndeko Seward akoya, Ndeko Frank Broy, Ndeko George DeArk. Oo, lisekwa elingi koloba mingi mpo na ngai. Nazali kotalela ngonga monene wana ya bolatisami motole. Mpe lokola Pole ebandi kopalangana: “Tokoyeba ndenge toyebami.” Tokosósóla, mpe—mpe tokoyeba lisusu baoyo toyébaki ná—ná baoyo bazalaka kuna.

<sup>82</sup> Mpe—mpe ebele, ekozala na bato ebele kuna baoyo tokanisaki kutu te ete bakokaki kozala kuna. Mpamba te, boyebi, ezali na ntango wana, oyo nandimaka ete “lipa oyo tobwakaki likoló na bato, na mái ya mikakatano, ekozongela biso na Mokolo wana.” Ntango tokomona mbano ya litatoli na

biso, likoló na bato oyo tososolaki te misala na bango mpo na Yango, ntango mosusu bakozala kuna. Mokolo nini oyo yango ekozala!

<sup>83</sup> Mpe na nsima, lisusu, nkóná oyo ekonaki biso, kokanisáká kutu te oyo yango ekokaki kosala, kasi bango oyo. Ebotaki mbuma ya motuya, mpe tokomona bango na Mokolo wana, bandeko mpe balingami ya matoyi mangóngi.

<sup>84</sup> Mpe nazokanisa ba-nkoto oyo namonaki kobongola motema, iyo, kino na ba-milió sikoyo, ezali se kokóba, mpe oyo lotómo na bango ezalaki. Oh, ekosengela ebele koleka lisekwa. Ekosengela na Seko-na-Seko, mpo na kokende zingazinga, kopesaka mbote ya loboko mpo na koyeba makambo oyo nayebi te na ngonga oyo.

<sup>85</sup> Ekozala na bamama wana ya nsuki mpembe, baoyo bozolatela bango feléle ya mpembe wana lelo, bakomona bino, mpe bakozala kitoko. Ekotalisama na poké ya felele te, to na elili ya mbange moko ya nsuki mpembe te; kasi na bokokani mpe kitoko ya lisekwa, bakotelema na bokokani ya Klisto, ya nzoto na bango ya lola, bilenge mpe kitoko mpo na libela. Ya solo mpenza, yango nde bopemi. Yango nde Mokolo ya mama oyo ngai nazali kozela. Yango nde kolatisama motole. Ezali te kolata felele na kazáka, kasi kolatisama motole ya elimo, mpamba te Nzambe asili kobongola ye!

<sup>86</sup> Nazokanisa mama na ngai moko, mbange mpe alembi, mpe azoléngá-lengá. Akozala kosala yango te na Mokolo wana. Ekozala ndenge mosusu na ntango wana. Mpe Pole monene wana ebandi kopanzana, wana tobandi kotala zingazinga, mpe zolongano monene ekobanda kokóma monene koleka mpe monene koleka mpe monene koleka. Nyonso ezali kaka kotalisa bobele mi ya Yesu. “Mpe nsima ya mwa ntango,” ndenge nzembo elobaki, “mpe nakomona Yesu na nsuka.”

Akozala kozela ngai, Yesu, na bopolo mpenza mpe solo.

Likolo na Ngwende kitoko na Ye, Akoyamba ngai na Ndako

Nsima na mokolo oyo kosila.

<sup>87</sup> Bongo, ntango tokomona Ye, mpe tokozala ndenge tozali sikoyo te. Toko—tokoyeba lisusu ndenge ya kolinga Ye mingi koleka. Tokotelema na nsima te ná mwa kobanga; mpamba te, tokozala lokola Ye. Ee, Akozala mpo na biso libota mpenza koleka ndenge Azali sikoyo. Tokososola Ye malamumu koleka. Mpamba te, tozali mosika mpenza, kati na nzoto ya kufa; na ntango wana tokozala na nzoto lokola nzoto na Ye ya nkembo. Tokoyeba lolenge ya kosambela Ye. Mpe ntango tokomona oyo Bozali ya Bomoto na Ye esili kosala epai na biso, kobongola biso; bobange ekozonga na bolenge, botengumi nyonso ekosembolama na mobimba. Oh! Tokosósola na ntango wana mpo na nini nguya na Ye ebikisaki biso.

88 Mituna oyo ezalaki na makanisi na biso: “Ndenge nini Akoki kosala yango? Ekozala nde likambo *oyo*?” Na lolenge moko to mosusu, na ndenge ya kokamwa, nyonso wana ekolimwa. Kpokósó oyo ekangamaki na makanisi na biso: “Ekozala nde likambo oyo? Ndenge nini yango ekaki kozala?” Na lolenge moko to mosusu, misapi ya motuya ekofungola, ekosembola polele kpokósó yango, mpe nyonso ekoingela kati na motole monene moko ya bolingo.

89 Bongo tokomona Ye. Na nsima, tokozala lokola Ye. Na ntango wana nde tokosambela Ye. Bongo tokomona mama ndenge Nzambe alingi komona ye.

Mama akozala mobimba Kuna te kozanga libota na ye.

90 Mpamba te ntango ya monene koleka na bomoi na ye mobimba ezalaka komona bana na ye zingazinga ya mesa, mpe bango nyonso na nzoto kólóngónú ná esengo; mpe—mpe—mpe komona ye kosala kafé, to nyonso oyo asalaka, mpe kobongisa bilei ya mpokwa, ye ná tata bafandi. Ee, yango nde ntango ya esengo koleka na bomoi ya mama, komona bana na ye nyonso na ndako.

91 Sikoyo, bózanga te, bózanga kozala Mokolo wana te. Tika ete monyololo monene ya libota na bino ekangana elongo, lilondo ná lilondo. Tika ete ekangisi moko moko ézala kati na liyiká. Na bongo ntango tokofanda elongo na mabota mpe masangá na biso, na mbalásáni ya Seko-na-Seko, Mokolo kitoko nini oyo yango ekozala! Na bongo tokososola.

92 Ezalaki Ye nde alakaki likambo oyo, na Emoniseli 1, epai Elobaki, ete: “Mopanga mopelaka na bipai nyonso mibale ebimaki na monoko na Ye.” “Abiangamaki Liloba na Nzambe.” Mpe eutaki na bibebu yango moko, oyo elobaki: “Nazali Ye oyo azali na bomoi, oyo akufaki; mpe Nazali na bomoi libela na libela.” Uta na bibebu yango moko, na Santu Yoane 6, ntuku misato na . . . elobi boye, ete: “Nakobungisa eloko moko te, kasi Nakosekwisa yango na mikolo na nsuka.” Ezalaki Ye nde apesaki elaka; bibebú yango moko ya motuya. Ye nde Moto Oyo abikisi milimo na biso, Oyo abikisi nzoto ya biso, Oyo asikolaki biso, mpe Oyo akosekwisa biso na mokolo ya nsuka.

93 Soki ozali mwa lilondo ya botaú wana oyo esili kokabola likita monene ya libota oyo na Mokolo wana, tika ete Nzambe ya Lola, na ntongo oyo, na lolenge moko to mosusu na ndenge ya kokamwa, áfungola bikanganelo mike yango oyo ekangami na makanisi na yo, mpe komonisa yo bolingo oyo Azali na yango mpo na yo, mpe tika ete óya na bopolo mpo na kosalela Ye.

Wana tozali kokanisa na ntina na makambo oyo, tóbondela.

94 Liboso ete tóbondela, ná mitó bógúmbi, nalingi kotuna bino. Bokosepela ko, na Mokolo oyo ya Mama, kobonzela Ye bomoi na bino sika lisusu, na kotaleláká lisekwa wana? Bokolinga

kotombola maboko epai na Ye? Wana moto nyonso . . . Nzambe ápambola bino.

<sup>95</sup> Ekoki kozala na mosumuki oyo azali awa sikoyo, oyo akolinga koloba: “E Nzambe, namikangisi naino na lilondo wana te. Nazali moko oyo azangi, oyo akozala kuna te ntango mama akokende kotala-tala zingazinga kuna na Nkembo. Nakozala kuna te, mpamba te natikálá naino kozala na kimia ná Nzambe te. Nazali na elikia ya Bomoi na Seko kati na ngai te. Kasi lelo na—nalingi kosala yango”? Okolinga kotombola loboko, koloba: “Bondela mpo na ngai, Ndeko Branham, na ngonga oyo. Nalingi ete ókanisa ngai na libondeli, mpo nazali na balingami na ngambo ya mbu, mbu ya Bomoi, mpe nalingi kokutana na bango”? Bótombola maboko.

<sup>96</sup> To moto moko oyo azongi nsima, mpe akolinga kozonga na mokolo oyo, mpe koloba: “Nkolo, namipesi lisusu epai na Yo; nayezi kozongisa sika boyokani na ngai ná Yo,” okolinga kotombola maboko?

<sup>97</sup> Tata na biso na Likoló, lokola ezali kobelema, mokolo oyo ekokómisa mokolo moko pene koleka na likambo yango. Mpe totindikami kaka na makasi, mobu moko moko, komona likambo oyo kotalisama.

<sup>98</sup> Ndenge bato bazalaki kokende na Yelusaleme na Mokolo ya Pentecote, mpe mpo na kopetolama ya mongombo ná esika ya búlee, mpe—mpe libonza ya mbeka mpo ya lisumu; mobu moko moko bazalaki komikanisela, ntango mwana mpate wana akufaki kuna, ete ntango moko ekoya, oyo Mwana-mpate ya Nzambe akokufa, mpo na kolongola lisumu. Ntango nyonso oyo mwa ekelamu wana ezalaki kobundabunda, mpe makila ezalaki kopanzana na maboko na bango, ekanisamelaki na bango ete ekozala na ntango moko oyo Mwana Mpate ya Nzambe, oyo akogánga, “Eli, lama . . . ? Eli, lama . . . ?” na ekulusu.

Nabondeli, Nzambe, ete wana tozali kotala lelo mpe komona ete . . .

<sup>99</sup> Eleki mwa ba-mpóso, liboso ya kokende na mosala na Yo, na California, Indiana oyo elalaki wana ekomba mpe ekufá, mpe bomoi ezalaki te, na komonana. Felele oyo ekufáki na ntango ya nkása kokwea eleki. Nkasa ekweaki longwa na banzete. Mpe máí ya nzete esilaki kokita na misisa, mpe nyonso esilaki kokufa.

<sup>100</sup> Kasi eleko moko ezalaki, oyo mói ebandaki kongenga na lolenge mosusu. Móí yango moko oyo engengaki kati na eleko ya malili makasi, kasi makambo ebongwanaki mpe engengaki na kokesene. Mpe na bongengi ya mói, ná makambo yango, bomoi ebimaki, bisika nyonso. Nkasa ezongi na banzete lisusu. Lokásá . . . Bomoi oyo etikaki lokásá, mpe lokásá yango ekweiaki, kasi bomoi ekendeki na mabelé; ezongaki na kitoko ya sika, kati na bongengi ya bolenge. Folólo oyo etikaki nsolo na—na yango ya malasi, mpe esilaki kotika bozengá na bongengi na



yango, ekweaki na kati ya mabelé; ebotamaki, epasukaki lisusu na bolenge na yango, ná nsolo ya malasi ya sika.

Yango ezali kokanisisa biso eloko nini, Nkolo, na bangonga oyo?

<sup>101</sup> Mpe mokili ebongwani longwa na lisobe moko ebetami, ekauká, kino na paladiso ya kitoko, mpe banzóí ná bandeke bakoyembáká, mpe biloko nyonso ekomi pepele na esengo, mpe banzete é—ékobináká na mipepe ya ebandeli ya eleko ya mói. Molungé mpe esengo ezalaki na mabelé lisusu, mpo na moi, m-ó-i.

<sup>102</sup> Kasi mokolo moko M-w-a-n-a azali koya ná lobiko kati na mapapu na Ye, mpe mwa ba-bomoi wana, oyo ebombamaki lokola máí ya nzete kati na nzete, na nsé na mabelé, lokola bo—bomoi oyo ezalaka kati ya momboto ya folólo, ekobota bomoi ya sika lisusu, mpo na kobeba ata moke te. Oh, totondi Yo mpenza mpo na yango!

<sup>103</sup> Mpe ezali na maboko mingi, mingi oyo etombwamaki na ntongo oyo, mpo bayebi ete na ngambo ya ezipelo kuna, eloko moko ezali. Bazali na mposa makasi ya komona mama. Bazali na mposa makasi ya komona balingami na bango mpe bayebani na bango, mpe koluka koyeba mabombami nyonso oyo, lolenge yango eyei awa, mpe longwa kati na ntango. Yango nyonso ezali nsima na ezipelo oyo ebombami. Mpe mokolo moko Okoya. Mpe batombolaki maboko; ba—ba—ba—balingi koyeba malamumu, Nkolo. Bazali komizongisa sika lisusu, ná ngai mpe lokola. Sikoyo sunga biso, Nkolo. Zongisa kondima na biso sika mpe nguya na biso.

<sup>104</sup> Mpe wana tozali koyoka kobeleva ya Nkolo. Mpe na mibu ntuku minei oyo eleki, Pentecote ya sika ebimaki na mokili. Molimo ebandaki komonisa makambo. Mpe tala biso oyo, na elembo ya nsuka, liboso mpenza ya Boyei. Toyebi kobeleva ya Nkolo, ekomi pene. Mpe tozali komona babeli kobikisama na bokono na bango, oyo ezalaki libombami mpo na mokili, mpo na mibu nkoto mibale, uta ntango ya bantoma. Kasi yango oyo ezali komonana lisusu, basakoli bazali kobima, Banje bazali komonana, bilembo mpe bikamwisi. Ezali nini? Lisekwa ezali kobeleva pene. M-w-a-n-a azali koya.

<sup>105</sup> Tika ete tómilengela, Nkolo. Tika ete tóyamba bilaka nyonso ya Bonzambe; tókanisa te na ntina ya mwa bikanganelo oyo esili kotóndisama na zebi, mpe bongo na bongo, ete ekoki kokóma te. Tiká éte ebanda kofungwana, na ntongo oyo, na nzela ya baoyo bakokufa te. . . [Maloba mazangi na eteni oyo ya bande—Mok.] . . . wana ezali Ye koningana-ningana kati na Biblia ya Maloba ya Nzambe, lokola lindánda ebongisami malamumu, mpo na koyemba maloba oyo: “Nazali Ye oyo akufaki, mpe azali na bomoi libela na libela.” “Nsima ya ntango moke, mokili mokomona Ngai lisusu te; kasi bino bokomona Ngai.”

“Mpo Nakozala elongo na bino, ata kati na bino, kino na nsuka ya mokili.” “Mpe ekosalema na mikolo ya nsuka, elobi Nzambe, ete Nakosopa Molimo na Ngai likoló na nzoto nyonso; bilembo mpe bikamwiseli; mikólo bakolota ba-ndoto, mpe bilenge bakomona bimononeli,” elembo ya mbula ya nsuka mpe ya ntango ya nsuka. Tika ete éyokama katikati na biso, na ntongo oyo, Nkolo, mpe tika ete kondima na biso ébatelama. Mpamba te tosenge yango na Nkombo na Yesu. Amen.



*MOKOLO YA MAMA* LIN59-0510M  
(Mother's Day)

Liteya ya Ndeko William Marrion Branham oyo, eteyamaki liboso na Anglais na Mokolo ya Mama, na ntongo ya mokolo mwa Lomingo, mokolo ya 10, sanza ya Mitano, 1959, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2022 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)